

欽定大清會典事例

欽定大清會典事例卷六百三十九

兵部

簡閱

綠營簡閱營伍二

嘉慶二年

諭官兵尋常操演。自應按時練習。如駕駛兵船。施放槍礮。及爬桅等技。藉以操演武備。則可。至於鳧水一節。行之冬令。令兵丁等冒寒入水。太不體恤。嗣後沿海地方。如尋常操演爬桅等技藝。仍照常演習外。至冬令鳧水。斷不可行。以示朕體恤水師準情酌理之意。

○四年覆准。初設水師。本不廢陸路操演。原以

防匪船逼近。必須短兵相接。或登岸逃逸。追擒尤期便捷。所用器械。與水面不同。自宜平日操演精熟。臨時方能制勝。嗣後水師兵丁。照舊兼習陸戰。並令該將軍等。實心訓練。務使技藝精純。以收實效。○又

諭兵丁操演技藝。是其首務。即云屯田技藝。亦不宜久廢。今倉貯糧石。均有餘積。每年仍用多人屯種。收穫糧石交倉。陳陳相因。徒致朽腐。莫如撤出。令其操演技藝。著將烏魯木齊中左右三營屯田之八百六十六名。每營留五百名屯種。庫爾喀喇烏蘇屯田之二

百四十名。精河屯田之一百二十名。每營留一半屯種。其餘均令撤回。交該管大臣等留心操演。斷不可草率。有名無實。○五年

諭。國家設兵。原以衛民。全在平時操演。方能得用。第承平日久。文恬武嬉。各營伍將弁。往往自耽安逸。竟不以操練為事。而該管上司。又復不加查察。以致日漸懈弛。即如調兵各省分。前曾降旨。諭令各該督撫提鎮。按數召募新兵。以備操防巡緝之用。自須時加訓練。悉成勁旅。一經調遣。即可得力。若僅以兵數充足。而不加之訓練。仍屬有名無實。轉致虛糜帑項。各該

督撫提鎮務須隨時認真操練使之技藝嫻習悉成可用之兵以飭營伍而重巡防。儻訓諭之後各該督撫提鎮等於營伍仍不實力整頓一經查出必當重治其罪。○又

諭直省為京師屏蔽各營兵丁自應勤加操演俾將勇兵強作王畿之捍衛。前因營汛墩臺多有坍塌損壞曾降旨令該督等飭屬加意整頓但修葺墩臺尚可藉口於無款可動若操演兵丁豈亦須動用款項乎此等訓練不力各營員最為錮弊直省總督等務須督率將備力加振奮認真操演冀成有用之師一二

年後必隨時特派欽差前往查看。如營伍再不能整齊精練。必將該督撫提鎮等一併治罪。斷不寬貸。○

又

諭黔省地控苗疆。界連川楚。兵防最關緊要。雲貴總督駐紮雲南。離黔省較遠。其貴州營伍不能隨時校閱。而鎮將平日訓練之勤惰。亦恐耳目難周。嗣後黔省總兵以下。均著巡撫節制。所有各鎮協營官兵。責成該撫隨時校閱。如有怠玩廢弛。即知會總督分別叅革。著為令。○六年奏准各省所屬營伍廢弛兼轄統轄官知情姑容者。降三級調用。失於查察不豫。

行揭叅者降二級留任。○又奏准總兵巡查所屬營汛隨帶親標兵丁如擅役民夫私受各營供應除照舊例革職外若該督提徇庇不行糾叅降三級調用不能查出者降一級留任其各營汛騎射是否優嫺軍裝器械是否齊整均出結申送該督提覈轉報部如結報不實將總兵降一級調用率行覈轉之提督降一級留任總督咨送吏部議處至提督所轄之營汛自行巡查如有前項情事亦照總兵例議處其駐紮寫遠委附近之副叅等官查閱如有擾累及閱報

不實。並率行覈轉者。俱一例分別議處。○又奏
准。直省設有防兵地方。專汛千把外委等官。隨
時整飭。統轄之副將參將遊擊叅轄之都司守
備等官。每季巡查一次。儻汛弁草率怠玩。以致
營伍廢弛。將汛弁照例革職。不行揭叅之叅轄
統轄官。降二級留任。儻巡查員弁藉端需索。照
因公科斂例革職。○又奏准。應行查閱之省。如
官兵調赴軍營。一時未能撤回者。即於摺內聲
明。將何省暫停查閱。其存營官兵。仍令督撫提
鎮不時稽察。如有廢弛。即行叅奏。○又奏准。武

職官員因公他出。將城守事務交與不應管之人。及上司將城守官弁盡行傳去。以至城空。或並非緊要事件。將遊擊都司守備千總把總等官。違例濫行差調者。俱降一級留任。若上司差調屬員。以致貽誤城守者。將濫調之上司革職。屬員免議。如不因差調自行貽誤城守者。將本員革職提問。○又奏准綠營將備有因弓馬生疏。經該管大臣上司等揭叅送部議處者。照軍政糾察才力不及例。降二級調用。○又奏准督撫提鎮按年輪巡。自行查閱營伍。如有千把總

等官。年力衰頽。弓馬不堪。經督撫提鎮查出。叅劾者。將不豫行揭報之該管上司。降二級留任。

○八年

諭。惠齡奏本年奉旨查閱陝甘營伍。自入春以來。各營將備紛紛呈請告病乞休。殊涉規避。向來軍政之年。不准告病。原以杜武員規避之漸。其奉旨查閱營伍年分。事關考覈。即與軍政無異。該營員如果自揣老病。何不及早呈明。必待臨時始行具報。其懸棧規避情節顯然。若不明定章程。無以整肅戎政。所有此次甘肅省告病乞休各員。著即照該督所奏。交署提督

蘇甯阿就近調驗。分別懲辦。不可稍有瞻顧。嗣後各省凡遇奉旨查閱營伍之年。均著照舉行軍政之例。不准告病乞休。違者照例叅辦。著為令。○九年

諭。國家設兵。所以衛民。內而八旗勁旅。外而駐防綠營。原以備一時徵調之用。我朝軍政修明。從前用兵外域。平定準噶爾。回部。大小金川。以及勦捕內地亂民。如王倫。蘇四十三。田五之類。均係調用額兵。隨征奏凱。從未有雇募鄉勇之事。自臺灣匪徒林爽文滋事時。該處地隔海洋。本有義民等急公慕義。請效馳驅。因而隨宜量用。協同官兵。分司按勦。迨至勦辦邪匪。

帶兵大員及地方官等。召募鄉勇多名。輟轉隨征。以致愈集愈多。數盈累萬。在鄉里小民等。各衛身家。遇地方偶有不靖。自行團集什伍。保護田廬。原屬通曉大義。分所當然。若竟官為雇募。隨營接仗。甚或調往隔省從征。經年累月。成何體制。試思八旗兵丁。如簡發東三省官兵。不聞有召募奉天等處民人從軍者。即簡發京營勁旅。亦從未有令大宛兩縣民人幫同出兵者。況國家兵制之設。有將軍都統督撫提鎮以資統轄。設立營伍。蒐簡軍實。豈尚不能為國宣力。乃必藉閭閻未經練習之人。供疆場折衝之用。則又安

用官兵為耶。揆厥所由。皆因武職大員。不能實心辦
公。平居無事。往往令本標兵丁。充僕隸所養之役。或
兼習手藝。在署傭工。而於訓練操演。轉視為具文。屬
下將弁。相率效尤。而督撫大吏。又不能隨時整飭。遂
致隸名營伍。步伐茫然。一旦有事徵調。其能知紀律。
陷陣衝鋒者。寥寥無幾。勢不得不募民以供調撥。非
惟兵不能衛民。而轉率民以充兵。則大非立制之意
矣。現在三省邪匪肅清。干戈永靖。然兵可百年不用。
不可一日無備。况兵之強弱。總視乎練兵之勤惰。如
勤加訓練。則弱者可漸使之強。儻玩愒從事。則强者

亦流而為弱。嗣後各省將軍都統督撫提鎮等。均應嚴飭營員。痛改積弊。於所轄官兵認真操演。俾標兵皆成勁旅。以肅軍政而勵戎行。○又

諭督撫提鎮。均有統轄營伍之責。嗣後務當飭知將弁等。平時訓練官兵。弓以六力為度。箭靶不得違式。暗加寬大。放槍者裝藥下子。句火均須迅速。而總以準頭為要。申明教誡。該督撫提鎮等。尤不得養尊處優。自耽安逸。惟應不時親加覈看。以期卒伍皆成勁旅。力挽綠營積習。方為不負委任。○又

諭近來各省督撫提鎮校閱營伍。甄別將弁等。止將千

把微員一二人塞責。於副參大員。往往瞻徇優容。即遇有年力衰邁。技藝平常者。亦不行叅劾。以致訓練不能得力。營務多就廢弛。即舉行軍政年分。亦不過將微末弁員。劾辦數人。充數搪塞。從未有認真考覈及副參以上大員者。即如提督珠隆阿。總兵孝順阿等。皆經朕訪知年力就衰。諭令開缺。及至來京召見。衰頹已極。武職大員。有營伍專責。安得容衰病人員。日久戀棧。致滋貽誤。况該副將遊擊等。或有曾經出兵。能著勞績者。即因老病舉劾。尚可邀恩給予俸養。若將老病各員。概事姑容。直待貽誤營伍時。始行叅

辦。則必全予罷褫。轉非所以成全出力營員之道。愛之正所謂害之矣。嗣後各督撫將軍都統提鎮等。務於所屬營伍。實心察覈。遇有年老多病之武職大員。亦即據實彈劾。毋得仍前徇庇。以期營伍日就整飭。

○十年

諭。國家設兵衛民。可百年不用。不可一日不備。是以訓練卒伍。必申儆於無事之時。所以謹戎政。飭武備也。乃比年每遇徵調。於額兵之外。多有藉資鄉勇之力。衝鋒陷陣者。即如湖南近日攻除苗寨。同知傅鼐督率練勇千餘人。陟險登先。所向克捷。而總兵魁保轉

帶領兵丁。在後為之策應。豈非以官兵怯懦。不若練
勇之趨健乎。苗疆如此。內地營伍更不待言矣。夫選
充鄉勇之人。即可選充卒伍之人。未有文員尚能練
習鄉民。使之盡力。武員轉不能練習兵丁。使之用命
者。推求其故。實由綠營習氣廢弛已甚。各省營員大
者養尊處優。小者偷安徇利。當募補兵額之時。即不
認真挑選。率以市井遊惰之徒充數。及入伍以後。又
不能勤加訓練。其所按期操演者。不過列營布陣。炫
耀觀瞻。循行故事而已。且有剋扣額餉。以衙署雜色
技藝服役之人。支領虛糧。冒充兵目。而兵丁等亦因

此心存怠玩。無所做畏。不特技勇毫無足恃。甚至如
粵東營卒。竟有潛通匪黨。毒害平民者。戎政曠廢如
此。若不急加整頓。則國家歲用數百萬帑金。募養師
徒。豈不竟同虛設耶。著各營督撫提鎮等。各發天良。
通飭所屬。嗣後挑補兵額。務須精壯驍勇之人。隨時
與之講明紀律。教習技藝。其演放槍箭。比試刀牌。毋
但取架式整齊。進退合度。惟以挽強命中。擊刺趨捷。
為上選。以練習鄉勇之法。練習兵丁。因其勤惰。分別
勸懲。再多方鼓勵。以作其有勇知方之氣。行之日久。
庶士皆勁旅。可收干城之效。督撫提鎮等。尚其實力

整飭。慎勿視為具文。有負朕諄諄訓誡至意。○十一

年

諭。兵部議將閩省陸路各營協酌歸將軍統轄一摺。著照所議。閩省除督標撫標提標各有專轄外。其餘陸路各營協均交該將軍一體統轄。其訓練操防各事宜亦俱照所請辦理。惟所議尚有未周到處。臺灣遠隔重洋。向來該處營伍原有本省將軍總督巡撫提鎮分年親往巡閱之例。乃近來該將軍等憚於涉險。因循廢弛。殊非慎重海防之道。嗣後該省將軍總督巡撫及水師陸路兩提督均著自本年為始。輪次親

赴臺灣。將該處營汛操防等事。逐一認真詳細察覈。事竣後專摺奏報。本年已有將軍賽沖阿渡臺督勦。著於內渡時查閱具奏。將來該督撫等即挨次遵照辦理。務期訓練精純。操防嚴肅。用副朕整飭武備綏靖海隅之至意。○又

諭嗣後各省營制訓練卒伍。總當以操練弓箭鳥槍為正技。長矛止可令其兼習。並著於額兵內止酌定十分之一。不許過額。其製造矛杆不得過一丈。如有違式製用者。經該管大員查出。即嚴行懲治。並將該將領一併叅處。○十二年議定。兵丁技藝生疏。軍裝器

械不能整齊。舊例止載該管官到任在三月以下者暫行免議。以觀後效。其兼統各官不豫行揭叅。已有失察處分。並未分別任事月日。應添載兼統各官。如到任在三月以下者。不能查出。亦免其失察處分。○又議准。凡各直省標營庫存立限修製各項礮位。均應建置礮車。謹慎蓋藏。安置高燥處所。各按應演日期操演。其安設各城門及各海口礮臺等處礮位。必須洗演潔淨。方可經久。應於每年霜降之前。用火藥洗演一次。如有收藏不慎。及不行洗演。以致起鏽漸

蝕者。查出題叅。將該管官罰俸六月。○又

諭。馬慧裕奏查閱河南省營伍情形。分別獎賞革休一摺。據稱該省有從前投效軍營出力。邀賞銜品。部議降等。以把總外委補用各員。現查南陽鎮標及鄧新營。均有此項人員。內惟一二人弓馬可觀。餘俱不諳營務。念其隨征曾經出力。請留營學習。二年期滿。再行甄別等語。此項軍營投效各員。從前功竣時。原因其稍有微勞。特照原賞銜品。降等以營弁補用。俾資造就。今據該撫查明豫省各員。弓馬多半平常。自應留營學習。惟馬慧裕定以二年為期。較之世職人員。

發標學習三年報滿之例。尚覺稍嚴。各該弁技藝既屬生疏。正須寬以時日。俾得從容訓練。今定以二年為期。過迫設屆時練習仍未精熟。遽行褫退。豈不阻其上進之志。所有河南省此項候補把總外委各員。著即照世職人員之例。均令其在營學習。三年期滿甄別。如果練習有成。即咨部挨次拔補。其實在不能當差者。亦著予原銜頂戴。飭令歸農。隨時報部存案。並著兵部行文川陝楚等省。凡有此項員弁。均即照此辦理。○十五年

諭。前因嘉慶七年勦辦邪匪。大功告成。經額勒登保等

奏川楚陝三省深山老林路徑分歧。酌議每年總兵會哨二次。提督會哨一次。三年之後。地方日臻甯謐。即行停止。當經降旨。以所議會哨之例。於三年後不必停止。或隔年一行。或隔二年一行。認真巡緝。今已逾數年。雖各營有巡閱舊章。但恐視為具文。奉行故事。嗣後川楚陝三省。每年輪派一省提鎮著於邊界徧歷周查。既可巡閱營伍。又可藉資彈壓。每巡哨一次。即行具奏。該提鎮等惟當隨時隨地督率稽查。不可有名無實。○十七年

諭。御史陳超曾奏本年三月舉行大閱典禮。各省營伍

請降旨通行一體整飭。國家設立兵制。原應勤加訓練。其直省遇應行簡閱之年。或差在京大臣。或交本省督撫。兵部請旨遵行。著有成例。本年朕舉行大閱典禮。各省查閱營伍。自有一定限期。毋庸因此議加整飭。惟是朕召見來京陞見之提鎮大員。詢及外省操閱營伍情形。多稱每年春秋兩季。時加操演。冬夏則恐妨農務。所言殊未覈實。古者寓兵於農。是以蒐苗獮狝。皆於農隙。以講武事。今者兵與農分。入營充伍者。月支糧餉。本無事於南畝。即勤加檢校。並無妨礙。嗣後各直省督撫提鎮。有統轄營伍之責者。著不

必拘定春秋之期於所屬弁兵不時訓練務令技藝精嫻有勇知方以簡軍實而嚴武備。○道光二年

諭嗣後山東曹兗兩鎮所轄及河標各營汛與江南徐海等屬營汛連界地方均著於每年春秋二季酌令各該營將領選帶弁兵在兩省交界適中處所定期會哨一次仍飭連界各專管汛弁一月會哨一次互換印照結報該上司查考其河南歸德營參將所屬分防夏邑等汛與徐鎮所轄蕭宿二營及亳州營都司分防連界各汛地亦著於春秋二季令各該營都司酌帶弁兵與歸德營將領定期在兩省交界適中

處所。會哨一次。接壤各汛弁。亦一月會巡一次。換照結報。其豫東連界各營。俱著一體照辦。並責成各該鎮營密加查察。如有不親往哨巡。僅以空文差丁互換塞責者。查出即指名嚴叅。儻該鎮知情徇隱者。著各該督撫一併叅處。其直隸大名鎮所轄各營汛。與山東曹濮及河南開封等營汛接壤之處。著直隸總督於適中地方。令都司守備。按春秋二季定期會哨。專汛員弁。按月哨巡。以昭嚴密。○三年奏定。各省隨營武生。並由馬步守兵考試。取中仍食原糧之武生。均一體隨營差操較拔。儻有恃矜滋事者。

失察之專管官降一級留任。若該管官徇縱不舉者降一級調用。兼轄官失察者罰俸一年。統轄官罰俸六月。○十三年

諭。每年各直省輪應查閱營伍之期。經兵部開單請簡。朕念由京員派往各省。不免供億之煩。且各省督撫皆朕所信任。一經特簡。即與欽差無異。是以即派該省總督及兼提督銜之巡撫查閱。原係曲加體恤。推誠不疑。乃近來營伍廢弛。教誡不嚴。如廣東兵丁竟吸食鴉片煙。河南兵丁行至安徽毆斃人命。攜帶幼童。福建兵丁勒折夫價。又有強搶鹽館之案。總緣各

該省督撫希圖見好。虛應故事。並不認真簡校。紀律不肅。職此之由。嗣後各直省督撫。平日當破除情面。認真校閱。務使營伍整肅。一兵必得一兵之用。方為不負委任。將來兵部奏請時。朕不論何省。仍照舊例。派公正大員前往。如查有訓練不精。軍實不齊者。惟該督撫是問。從重治罪。決不寬貸。○十四年

諭楊遇春奏請減會哨次數。以節糜費一摺。甘肅沿邊一帶地方。山多路雜。易於藏姦。向派甘州涼州西甯肅州各提鎮。並副參遊擊等員。各帶弁兵。按月前往各要隘處所。分別會哨。統計每年會哨十二次。茲據

該督查明沿邊地方。連年頗屬乂安。其扼要之扁都口外。又設有察漢俄卜營制。足資彈壓巡防。所有每年會哨次數。自應酌量裁減。著自道光十四年為始。每年春季三月。提鎮會哨一次。夏季六月。永安洪水鎮番鎮夷甘標各營遊擊會哨一次。秋季九月。鎮海永固永昌金塔甘州城守各營副將參將會哨一次。冬季十二月。仍令永安洪水鎮番鎮夷甘標各營遊擊會哨一次。統計每年會哨四次。其餘八箇月。仍責令各該營各於所管地方。照舊派令妥幹弁兵。按月周歷巡查。儻敢怠玩從事。致有姦匪潛匿境內者。立

即嚴叅懲辦。毋稍寬貸。○十五年議准。奉派查閱營伍之大臣。於該省滿漢各營。兵丁輟弱。技藝生疏。或弓力不符。槍礮無準。營伍廢弛。並不據實叅奏。顚預了事者。降三級調用。○又

諭。申啟賢奏查閱省城營伍。請將叅將守備等員。分別降調留任。已降旨允行矣。巡撫職兼提督。校閱營伍。據實考覈。分別示懲。本屬分內應為之事。申啟賢甫膺外任。營務素未諳習。一切操防訓練諸事。猶恐未必盡滿朕意。然如所奏虛報弓力。擡槍烏槍。竟有全未中靶者。撫標係巡撫專轄。城守近在省垣。果能留

心訓練其強弱更易周知。前任巡撫鄂順安在任數年。營伍如此廢弛。實屬辜恩溺職。至本年山西輪應校閱之期。哈琅阿祥康皆係朕親信大臣。特派前往。宜如何實心甄別。不避嫌怨。今省城滿漢營務若此。各營似此者尚不知凡幾。是其校閱時一味顛頑。搪塞了事。全不以公事為重。殊失朕特簡大臣整飭營伍之至意。哈琅阿祥康均著交部嚴加議處。鄂順安著一併交部嚴加議處。欽此。遵。

旨具奏。將鑲紅旗蒙古都統侯哈琅阿。吉林將軍宗室祥康。均比照營伍廢弛兼統官明知姑容降三

級調用例上。加等各議以降四級調用。毋庸查
級議抵。哈琅阿身兼一等侯爵。除將都統職任
議以降四級調用外。其世職再照例每一級折
罰世職半俸三年。共折罰世職半俸十二年。免
其降調世職奉

諭。哈琅阿著革去都統。退出御前侍衛。降為二等侍衛。
在乾清門行走。照部議罰世職半俸十二年。免其降
調世職。仍留管理上虞備用處火器營虎槍營差使。
其餘一切管項。概行革退。祥康著降為四品頂戴。補
授盛京副都統。仍帶降三級留任處分。鄂順安著降

為藍翎侍衛。作為駐藏辦事大臣。到京後不准請訓。以示懲儆。○十九年奏准。武職官員。於查閱營伍時。捏報年歲。有意蒙混者革職。○二十三年覆准。直隸大名鎮。與河南河北鎮。山東曹州鎮。勢如鼎足。相為控制。每屆冬令。該三鎮總兵。選帶弁兵。親往三省交界適中處所。會哨一次。挨查所管地面。是否肅清。實在情形。會銜具奏。其連界各營員。隔月會哨一次。專汛員弁。逐月會巡一次。俱互換印照。結報該上司查考。仍責成該鎮道密加查察。如有不親往哨巡。僅以空文差丁。

互換塞責者。由該督撫責成各鎮道查叅鎮道知情徇隱者。由該督撫一併奏叅交部議處。

二十七年

諭嗣後各直省大吏閱兵時。務須嚴申軍令。不得奉行故事。置紀律於不問。並嚴飭統帥將領各員。潔己奉公。身先士卒。如有弁兵干犯號令。即治專閫以約束。不嚴之罪。庶幾水陸營汛一律嚴整。盜賊不敢竊發。邊圉由是肅清。○二十八年

諭每屆五年特派大臣查閱營伍之時。弁兵技藝認真考校。定其優劣。其材具平庸者。即行叅奏。若有操兵

認真人材出衆之員。著准其據實保奏。以昭激勸。至各營槍靶箭靶。明定遠近章程。以防弊混。嗣後操演。擡礮立靶。著以一百五十弓為率。一人施放鳥槍。以八十弓為率。步箭以三十弓為率。各直省將弁兵丁。務當恪遵功令。如法練習。操演之時。各該管官必須親自履勘。按例設靶。一經查有任意加寬加高及改近情弊。立即懲辦。毋稍寬貸。並著欽差覆奏摺內聲明。以昭覈實。○咸豐三年

諭。各直省陸營額設兵數。統計六十餘萬之多。如果該管各官認真訓練。俾技藝日精。自足備干城之選。現

在逆氛未靖。各省官兵俱有徵調。而存營兵丁尚復不少。著各該督撫提鎮嚴飭各營將弁。將存營官兵裁汰老弱。挑選精壯。定期分練合操。其應差兵丁亦必照常操演。仍由各督撫提鎮頒給章程。明示賞罰。每月委員會同校閱。儻有老弱充數。技藝生疏。或查有空糧情弊。即著從嚴叅辦。毋稍瞻徇。其各省駐防官兵著一律照此辦理。○又議准各直省綠營春秋兩操。兼閱官員槍礮。不得專視弓箭優劣以定去取。每員演放以三槍三礮為出數。中一槍一礮為合式。兩槍兩礮以上為有準。需用鉛丸火

藥。由官弁自行備辦。如有訓練不精。施放無準者。該督撫即據實奏劾。並將各員弁槍礮出數造冊報部。以憑覈辦。○光緒九年奏准軍營打仗受傷員弁不能射箭者。查驗實係手足受有重傷。准予請免騎射。如有捏飾情弊。將本官及驗看出結之員。代為奏請之督撫大臣。照告病不實例。分別議處。請免騎射員弁。令改練槍礮。凡遇軍政閱伍及一切操練。亦均考驗槍礮。儻演習不精。照弓馬生疏例。奏叅懲處。

欽定大清會典事例卷六百四十

兵部

卹賞 卹賞陣亡官員

卹賞陣亡官員。○順治年間定八旗陣亡各官。應得贈廕。由部開列官籍。移咨吏部。按品贈爵。予廕。應得祭葬。移咨禮部。照例議給。○又定八旗陣亡官。給予卹銀。都統一等子。卹銀一千二百兩。二等子。一千五十兩。三等子。一千兩。一等男兼一雲騎尉。九百五十兩。前鋒護軍各統領。副都統一等男。九百兩。二等男。八百五十兩。三

等男八百兩。一品官不管兵者如之。參領一等輕車都尉兼一雲騎尉七百五十兩。一等輕車都尉七百兩。二等輕車都尉六百五十兩。三等輕車都尉六百兩。王府長史照三等輕車都尉例。二品官不管兵者亦如之。騎都尉兼一雲騎尉五百五十兩。騎都尉五百兩。不管兵輕車都尉品級官如之。佐領四百五十兩。雲騎尉四百兩。貝勒司儀長不管兵騎都尉品級官如之。散秩官二百五十兩。雲騎尉品級官如之。護軍校驍騎校六品官二百五十兩。七品八品官二百

二十兩。委署護軍統領。副都統。參領。散秩官。或世爵小及無世爵者。各照本身應得陣亡卹銀外。再加銀五十兩。○康熙十三年題准。綠營武職陣亡。均給以加贈。提督。總兵官各加贈三級。副將。參將各加贈二級。遊擊。都司。守備各加贈一級。應得祭葬。行文禮部議給。○又題准。綠營陣亡官給予卹銀。提督卹銀八百兩。總兵官七百兩。副將六百兩。參將五百兩。遊擊四百兩。都司三百五十兩。守備三百兩。守禦所千總二百五十兩。衛千總二百兩。營千總一百五十兩。把

總一百兩。○二十二年題准。出征病故文武各官。三四品者。卹銀五十兩。五六品者。卹銀四十兩。七品以下。卹銀三十兩。○又定。出征病故官兵。骸骨歸旗。准其入城。○雍正十二年議准。綠營武職陣亡。給廕。向例三品以上。均廕以守備。四品至把總。均廕以衛千總。嗣後陣亡之提督總兵官。廕子弟一人。以都司用。副將參將遊擊。廕子弟一人。以守備用。都司守備。廕子弟一人。以衛千總用。千總把總。廕子弟一人。以把總用。○又議准。陣亡各官。應得難廕。或因子殘廢不

能承襲其孫雖生於題廕之後。該督撫將未經請廕緣由。覈實聲明。取具地方印甘各結送部。准其補廕。○乾隆六年奏准。外委官陣亡。照把總例。給卹銀一百兩。○七年覆准。出征病故各官。一二品提鎮。皆有遺本。應否卹賞。向係候旨遵行。至三品以下等官。定例載有給賞之條。惟二品副將出征病故者。獨無給賞。嗣後副將出征病故者。照三四品例。給卹銀五十兩。○十四年覆准。武職陣亡。自提督至守備。皆有加贈。惟千總把總並無加贈。同一捐軀死節。自應一例優

卹。以勵戎行。千總把總陣亡者。照守備例。加贈一級。○二十五年奉

旨。官兵因傷身死。亦與陣亡者相同。應照陣亡例議卹。○又題准。陣亡官員。應得祭葬。移咨禮工二部議給。○三十八年奉

旨。此次進剿金川陣傷亡故弁兵。所遺家口親老丁單者。按名給予半餉。以示體恤。○三十九年

諭。向來八旗人員。身任旗職。如遇陣亡等事。子孫議給世職。其有年未及歲者。並照應得世職。給予半俸。至旗人簡用綠營官員。陣亡議卹。子孫即照綠營官職

予以廕生。其年未及歲者。未經議給。應得分例。第思此等同為旗人。雖予廕之例不可易。而效命疆場。其子孫當幼穉之時。養贍無資。情殊可憫。其應如何酌量加恩之處。著軍機大臣會同該部定議具奏。欽此。遵

旨。議奏。旗人補放綠營官員陣亡。其子廕子孫。年未及歲者。請照旗員品級減一等支給半俸。奉

旨。旗人簡用綠營之後。即與漢人之任綠營者無異。遇有應行議卹之事。惟照綠營給以廕生。初無區別。若因本係旗人。憫其子孫。酌予半俸。而漢員子孫置之

不論。則是均一綠營官員。獨於優卹歧而二之。豈朕一視同仁之道。嗣後無論旗人補用綠營。及綠營中漢員。遇有陣亡議廕。其子孫年未及歲者。俱著一體加恩賞給馬糧一分。以示優卹維均之至意。著為令。

○又覆准旗人簡用綠營官員。陣亡議卹。給予廕生。不准世襲。此等承廕人員。才具優劣不同。其年之少壯。亦復不齊。若概令補用綠營。既不能為人表率。且恐轉染綠營習氣。嗣後八旗難廕人員。年已及歲。俱由兵部帶領引

見恭候

欽定。准用外任者。照例補用綠營。不外用者。留旗當差。遇有對品缺出補用。其應用千總把總者。如外用。即掣補直隸及京城巡捕營缺。其留旗者。千總仍補驍騎校。把總對品。止有城門吏一官。補用較難。應照各旗七品監生之例。留在印房行走。遇有該旗驍騎校等官缺出。同應升人員一體揀補。至於年未及歲。應給馬糧一分。即照八旗馬甲之例支給。○又定。陣亡一二三等公侯伯。領侍衛內大臣。內大臣。將軍。左副將軍。卹銀一千一百兩。步軍統領。卹銀九百兩。散秩大

臣卹銀八百兩。火器營營總。

圓明園營總健銳營翼長總管副總管城守尉協領。一等侍衛卹銀七百五十兩。一等護衛卹銀六百兩。前鋒侍衛各營副參領二等侍衛駐防四品參領總管防守尉管水手四品官卹銀四百五十兩。二等護衛四品典儀卹銀四百兩。三等侍衛。

圓明園健銳營委署參領防禦管水手五品官閒散章京包衣正副參領卹銀三百五十兩。四等侍衛及三等護衛五品典儀並不管兵之五品

官卹銀三百兩。前鋒親軍等校藍翎侍衛管水手六品官及六品典儀並六品職銜等官卹銀二百五十兩。恩騎尉及七八品典儀並七八品職銜等官卹銀二百二十兩。不管兵之六品官亦照此例。○又定參贊大臣若世職大者照伊世職給銀。世職小及無世職者照伊原銜給銀。委署大臣官員即照委署職銜給銀。○又奏准出征病故文武一二品大臣卹銀二百兩。○又奏准出征委署人員陣亡俱照委署品級議卹。其賞給空銜孔雀翎藍翎及兵丁帶獎賞藍翎

陣亡者。俱照孔雀翎藍翎侍衛品級議卹。○又覆准。官兵因傷身故。准照陣亡例議卹。宜立定期限。以示區別。如受四五等傷。以四十日為限。二三等傷。以七十日為限。頭等傷。以半年為限。其在軍營傷亡者。令該將軍查驗報部。在中途以及回旗回籍各官兵。令該管大臣查驗報部。均須實因本傷身亡。與受傷原冊相符者。始准議給卹典。其因病身亡。不得以曾經受傷。概照傷亡請卹。○四十一年

諭。前因各營兵丁。有受傷遣回殘廢難痊者。曾降旨令

各督提查明。仍給守糧一分。以資養贍。其弁員在軍營打仗出力。因傷病廢。與前項兵丁事同一例。若照尋常衰病勒休。情殊可憫。著雲貴陝甘四川湖廣各督提。查明節次。派往軍營之千把外委。如有因打仗受傷。難以痊愈者。一面咨部開缺。仍加恩給錢糧一分。以養餘年。○四十二年奏准。軍營病故官員。眷屬無依。亦照出征病故兵丁家口無依之例。給予半餉。以資養贍。俟伊子成丁之日。即行住支。○

四十六年

諭。向來軍營打仗受傷官兵。定例分為五等。凡受傷時

即有例賞。其因傷身故者。頭等傷以半年為限。二三等傷以七十日為限。至四五等傷以四十日為限。限內因傷亡故者。仍照陣亡例給予卹典。恩至渥也。但向例頭等傷與二三四五等傷。所定期限未免懸殊。其限外因傷亡故者。即不得邀陣亡恩卹之例。情殊可憫。於軫卹傷亡之道。尚未周至。且受傷雖有輕重之不同。其略帶浮傷者。原毋庸列入等第。其實在打仗出力。衝冒槍礮受傷者。分作一二三等。已足以昭詳覈。多分等差。過為區別。轉啟高下其手之弊。所有官兵受傷等第。向立例限。並限外身故者。應如何酌

加賞卹之處。著交該部另行詳悉妥議具奏。欽此。遵旨議定。除頭等傷例限半年。為期適當。毋庸更定外。其傷列二三等者。亦照原定限期量為加增。二等者應予限五箇月。三等者予限四箇月。軍營大臣查明實係限內因本傷身故者。照陣亡例議卹。其四五等傷名目。概予刪除。以期覈實。至限外亡故官兵。頭等傷再予限六箇月。二等傷再予限五箇月。三等傷再予限四箇月。如在餘限內傷發亡故者。一二品大員。廕子弟一人。以六品官用。三品以下官。原列頭二等傷者。廕子弟

一人。以七品官用。列三等傷者。廕子弟一人。以八品官用。均按品食俸。旗人百日孝滿後。由本旗帶領引。

見。隨旗當差。綠營即交各該督撫就近留於本省學習。期滿照原廕品級酌量以千把總等官補用。此內如無嫡親子弟。堪以承廕。或雖有子弟。而官職均在應廕品級以上者。應照原列受傷等第。再行照例卹賞銀兩。毋庸議給官職。其年未及歲者。應請給予半俸。俟當差時再行按品支食全俸。其應廕之人。如有未仕而故者。應准補。

廕。此等限外因傷亡故員弁。令該管各官出具印甘各結。報部查辦。如在餘限外亡故者。為期既久。毋庸置議。○四十九年議准。陣亡人員。無論漢人及旗人。之用於綠營者。俱照旗員例。一體議給世職。所有陣亡廕贈舊例。俱行刪除。○又奏准。降調暫停開缺人員。續經陣亡。均照所降職銜。議予卹廕。緣事革職人員。續經陣亡。給還原銜。毋庸加贈。仍照陣亡例。減半卹廕。○又奏准。領催人等。因在軍營打仗奮勉。隨時委署官職。陣亡者。照七品官例議卹。○又奏准。出征

旗員。暫署綠營員缺。打仗陣亡者。亦即照伊本身旗員實缺之例。給予卹典。○又奏准。官兵於打仗時。失足滾崖落水等項。以及未出官兵。後經查明。實係殞命無疑者。俱照陣亡例議卹。其因公差遭遇賊被掠者。照陣亡例減半議卹。○

又

諭。向來旗員效力行間。懋著勞績。及臨陣捐軀者。其子孫俱應得世職。即年未及歲。業經承襲。尚未當差者。亦給予半俸。以資養贍。而綠營員弁陣亡議卹之例。止得難廕一次。非奉特旨。照旗員加恩予卹。不能得

有世職。而其子孫年未及歲。亦不能予襲。蓋因綠營人員隨征打仗。本不如旗人之奮勇出力。而綠營所得俸薪養廉等項。較多於旗人。其軍功議敘及賞賚一切。固不能一律。亦所當然。至效命疆場。則同一抒忠死事。朕不忍稍存歧視。嗣後綠營員弁。除軍功議敘卹賞。仍照舊例辦理外。若陣亡人員。毋論漢人及旗人之用於綠營者。總應與旗人一體給予世職。即襲次已完。亦應照例酌給恩騎尉。俾賞延於世。以示朕獎勵戎行一視同仁至意。○五十年議准。嗣後出征立功病故人員。無論旗員綠營。曾經議敘及

未經議敘者。如未奉

特旨加恩。均由兵部查該領兵大臣原保等第。與給
廕之例相符。即一體照例給予廕監。旗人以各
營之委護軍校。或藍翎長改補。漢人以把總外
委拔補。其有情願應試及隨營食糧者。聽其呈
明照例辦理。○又議准。嗣後官員因公差委。在
大洋大江遭風淹斃。及在內洋內河因公淹斃
者。仍按其官階。各照舊例分別給予廕贈卹賞。
將舊例內照陣亡字樣刪去。○五十四年題准
陣亡官員。議給世職。應得襲職。

教書。移咨吏部辦理。○五十七年

諭。難廕員弁。在營學習年滿後。如果弓馬熟練。差操勤勉。自應秉公拔補。俾得及時效用。若人材弓馬平常。不堪造就。亦當令其回籍。乃既不拔補。又不令其回籍。殊非整飭營伍體恤微弁之道。應如何立定年限。著軍機大臣會同該部定議具奏。欽此。遵

旨議定。難廕人員。於乾隆四十年。曾奏准照漢世職分發學習之例。定以三年為滿。除守備以上等官。學習期滿。送部引

見留京選用者。應照舊例辦理外。其發回原省題補。

及經各督撫咨明堪以千把拔補各員弁。應以分發到營學習之日為始。統限五年後挨次補用。仍隨時察覈。如有始勤終怠不堪造就者。不拘年限。即行勒休。其自揣才力不及。或以窘乏呈請者。亦准其告退。儻考拔實有屈抑不公。准令各員弁據實呈明。各該提督及督撫等。嚴行究辦。○五十九年奏准。八旗出征打仗受傷。在餘限內傷發亡故官員。廕給子弟六七八品等官。六品官。以前鋒校護軍校驍騎校改用。七八品官。以各營之委前鋒校委護軍校藍翎長揀

選改用。未經得缺以前。隨旗當差。由領催前鋒
護軍承襲者。仍食本身錢糧。不必開領催等缺。
由閒散人等承襲者。照例按品食俸。○嘉慶元
年

諭散秩大臣銜屯守備木塔爾。屢次奉調出兵。尚能出
力。茲從征苗匪。患病回川。途次身故。實為可惜。著即
加恩。照陣亡之例。准其子阿申承襲一次。並念伊母
年逾八十。著將木塔爾應得分例。減半給予伊子。以
資養贍。至阿申及歲時。再行酌量以屯弁拔補。以示
體恤。勤勞格外恩施。至意。○四年奏准。委署人員陣

亡。應將某人係署某人何缺之處。聲明報部。實係委署額缺者。仍照舊例辦理外。其非委署額缺。並額外空銜。均按其本銜議卹。至領催人等。在軍前委署官職。打仗陣亡。亦應查明實係委署額缺。始准照七品官議卹。○六年奏准。軍營武職官員。以小銜署大銜。打仗陣亡。查明係軍營大臣奏明奉

旨准其升署者。照所署品級議卹。若止係軍營暫行委署。雖屬額缺。仍按其原銜議卹。不准照委署品級議卹。其由軍營拔補外委。及外委拔補把

總千總。雖已拔補。而未經咨報到部陣亡者。外委等仍按原銜議卹。○又奏准。出征人員經軍營大臣奏明奉

旨賞給空銜孔雀翎藍翎。陣亡傷亡及立功後病故者。准照賞給職銜品級議卹。兵丁出征立功。經軍營大臣奏明奉

旨賞戴藍翎。陣亡傷亡及立功後病故者。准照七品以下官例議卹。○又奏准。緣事降調暫停開缺。仍留軍營效力人員。打仗陣亡。如奉

特旨照原銜議卹者。兵部欽遵辦理。其餘照所降職

銜議卹。○又奏准官員緣事革職在軍前效力續經打仗陣亡傷亡如先經奉

旨賞給頂戴職銜並軍營大臣曾已奏明署理員缺者按其現在品級議給卹典其未給職銜亦未奏明署理員缺者各按原銜照陣亡例減半議卹至原係八旗一二品大臣綠營提督總兵應得騎都尉者降等給予雲騎尉俱准其承襲一次毋庸再給恩騎尉八旗三品以下綠營副將以下各官應得雲騎尉者降等給予恩騎尉准其承襲一次凡遇陣亡應行減半議卹者均照

此例辦理。○又奏准。打仗迷失衝失未出各官。查明實係陣亡者。仍照陣亡例議卹。查明實在無著各官。令領兵各員出具並無脫逃印結送部。照陣亡例減半議卹。○又奏准。官員出征。於打仗時失足滾崖落水等項。以及迷失衝失未出。查明實係殞命無疑。准照陣亡例議卹者。照例給予賞銀世職外。其因公差遭遇賊被掠。及打仗未出無著等項。除查明係曾經立功人員。照陣亡例減半給予卹賞銀兩。仍按立功等第。給予伊子廕監。如係未經立功之員。止准照陣

亡例減半給予卹賞銀兩。毋庸議給廕監。○又奏准。八旗一二品大臣。綠營提督總兵。若在軍營著有勞績病故奉

旨交部議卹者。均卹賞銀二百兩。廕一子。給予六品頂戴。帶領引

見。作何錄用之處請

旨。其甫到軍營並未著有勞績。旋即病故者。即照例給予卹賞。毋庸議給廕監。○又奏准。守禦所千總陣亡。原給卹銀二百五十兩。今酌給二百兩。衛千總原給銀二百兩。今酌給一百五十兩。餘

丁給銀二十五兩。○又奏准軍營領催人等令其署理官職。雖屬額缺。未經奏明。及額外外委。雖已拔補外委。尚未咨報到部。旋即陣亡。仍各按其本身應得卹銀給予。至兵丁立功後。賞戴藍翎。陣傷亡故。如未經奏明。係軍營隨時獎賞者。亦仍各照本身應得卹銀給予。○又奏准官兵出洋巡哨。遭風飄沒身故者。提督給銀八百兩。總兵七百兩。副將六百兩。參將五百兩。遊擊四百兩。都司三百五十兩。守備三百兩。守禦所千總二百兩。營衛千總一百五十兩。把總一百

兩。經制外委照把總給予。提督總兵各加贈三級。副將參將各加贈二級。遊擊都司守備千總把總各加贈一級。提督總兵廕子弟一人。以都司補用。副將參將遊擊廕子弟一人。以守備補用。都司守備廕子弟一人。以衛千總補用。千總把總廕子弟一人。以把總補用。○又奏准。官兵巡哨。因擒拏盜匪被賊戕害者。提鎮各官俱照遭風飄沒身故例。給予銀兩。提督給騎都尉。又一雲騎尉世職。總兵給騎都尉世職。副將以下。把總經制外委以上。俱給予雲騎尉世職。襲次

完時。俱毋庸給予恩騎尉世職。又官員出洋擒拏盜匪被害。該督撫具奏。欽奉

恩旨著照陣亡例議卹。或奉

旨交部議卹者。俱照此例辦理。○又奏准。旗員帶兵船巡哨。在大洋大江遭風飄沒身故者。官兵俱照陣亡例分別給卹。賞銀兩。三品官廕子弟一人。以五品官用。四五品官廕子弟一人。以六品官用。六品以下官廕子弟一人。以七品官用。均按品食俸。百日孝滿後。由本旗帶領引

見。遇有職任缺出。對品補用。未經得缺以前。隨旗當

差。其年未及歲者。給予半俸。如應廕之人未仕而故者。准其補廕。若在内洋内河及停泊海口島嶼等處。遭風飄沒身故者。官兵俱照陣亡例減半給予卹賞銀兩。官員照前例減一等給予襲廕。○七年

諭副將韓自昌勦賊陣亡。前經額勒登保奏到。當即交部賜卹。茲聞伊即係前次陣亡副將韓加業之胞兄弟。兄均沒於王事。且家有八旬老母。甚為可憫。韓自昌著加恩照總兵陣亡例議卹。其一切資送回籍。俱官為辦理。再加賞伊母銀三百兩。並著惠齡派地方

官於伊原籍。官建祠堂一座。賜名雙烈祠。令本處地方官春秋致祭。伊共有子幾人。俟服闋後。俱著送部引見。如無子嗣。即查伊胞姪咨送。以示朕優卹忠蓋至意。○又奏准。陣亡傷亡人員。有本身應追採買覈減及分賠代賠等項銀兩。咨部豁免。毋庸逐案具題。○八年

諭額勒登保奏督師入川。由大平通江境內按勦情形一摺。據稱接據遊擊劉元明稟報。劉元明隨同穆克登布趕勦由南江玉坡竄來之零匪八九十人。至樓房坪地方。探悉該匪在亮垵子老林藏匿。穆克登布

率領參將王兆龍營總浸巴圖帶兵飛馬上前親身督率進抵山根。該處均係密菁老林。馬不能進。遙見山頂有賊匪二三十人。穆克登布催令劉元明帶領兵勇覓路上搶。齊至山頂。前隊正在按殺。浸巴圖等接續前進。行至半坡。旁林中突出伏賊數十人。官兵奮力攪殺。浸巴圖王兆龍身受矛傷數處陣亡。穆克登布帶領戈什哈弁兵數名。徒步趕進救援。連射數賊。不意弓梢斷折。亦被旁賊用矛刺中脅肋倒地。隨從兵丁阿恆泰周昇馬成功上前護救。亦受矛傷陣亡等語。此起竄匪。係宋應伏分股敗殘餘孽。為數止

八九十人。經官兵跟蹤趕剿。該匪等竄入亮垵子山藏匿。穆克登布帶兵奮擊。於密箐老林之中。催令搶上接殺。致被伏賊突出。戕害官兵。該提督復徒步救援。因弓梢斷折。同時被戕。穆克登布素來奮勇。此次自以餘匪無多。未免心存玩敵。冒險輕進。以致於猝不及防時。身被戕害。但究係沒於王事。實深憐惜。且該提督出師數年。殺賊擒渠。歷著勞績。朕雖未見其人。而每於軍營奏報時。稔知其奮勇宣力。是以擢至提督。並賞給騎都尉世職。特挑授御前侍衛。茲以接捕捐軀。不特額勒登保失去指臂之助。心切痛傷。即

朕亦殊深悼惜。穆克登布著加恩。交部賜卹。於原有世職上加一等。賞給輕車都尉世職。並查明伊子。即令承襲。如已及歲。於百日孝滿後。帶領引見。不必俟年終辦理。參將王兆龍營總浸巴圖。奮勇殺賊。遇伏陣亡。亦殊可惜。吉林甲兵阿恆泰。兵丁周昇馬。成功上前護救。同時受傷被害。均著咨部照例賜卹。○又諭。前曾降旨。將勦賊陣亡之甘肅提督穆克登布。於原有世職上加一等。賞給輕車都尉。經吏部奏請等第。並據穆克登布之父成德。在該旗呈稱。穆克登布年輕福薄。冒昧輕進。並未治罪。復蒙恩加賞世職。不勝

感悚等語。穆克登布勦辦亮垵子零匪。親督將弁奮勇殺賊。因弓梢折斷。至被矛傷。該處零匪。本屬無多。穆克登布雖不免意存輕敵。但業經臨陣捐軀。亦何忍責以冒昧輕進之咎。且伊父成德年近八旬。駭疾殘廢。殊堪憫惻。向例提督陣亡卹典。應給予騎都尉。又一雲騎尉。伊本有騎都尉世職。著施恩加賞一等輕車都尉。與提督應得卹典世職合併為二等男。照例承襲。○九年

諭。朕披閱勦平邪匪方略內載。散秩大臣佛住。在東鄉勦賊時。與協領塔克新等九員。同時陣亡。曾諭知觀

成等。將佛住及塔克新等。一併咨部加一等優卹。因令軍機大臣查明當時如何優卹之處。旋據交查兵部。佛住本係三等子爵。因明發諭旨內。有優卹字樣。是以加等議給一等子。又一雲騎尉。其塔克新等九員。因明發諭旨內。止係交部議卹。並無從優二字。部中辦理卹典時。並未加等議給等語。該員等本與佛住同時陣亡。佛住既邀優卹。則該員等亦應一體從優。從前明發諭旨內。自係書寫遺漏。協領塔克新。佐領石柱。遊擊范楫。防禦貴隆。額勒精佈。守備楊成白。知縣陸霖。張宇陽。典史楊永錫。著該部將所得卹典。

仍加恩從優補給。以示朕憫念。蓋臣至意。○十年奏准。軍營出力人員。奉

旨。以應升之缺。升用。未經補缺。續經陣亡者。仍應按照原銜議卹。○十二年奏准。出洋巡哨擒拏盜賊被害官員。奉

旨。照陣亡例。賜卹者。從前原係照軍營打仗陣亡例。一律議給卹賞。其應得世職襲次完時。給予恩騎尉。世襲罔替。後改為世職襲次完時。俱毋庸給予恩騎尉。惟是官員出洋巡哨。衝風破浪。艱險異常。其擒拏盜賊被賊戕害者。與軍營官員

帶兵打仗陣亡者。原無區別。嗣後外洋水師官員。如有擒拏盜賊。致被戕害。經該督撫具奏。奉旨照陣亡例賜卹。並奉

旨交部議卹。俱應照陣亡例議卹。按其應得世職襲次完時。仍給予恩騎尉世襲罔替。以廣

皇仁。原例所載毋庸給予恩騎尉之處。應行刪除。○又題准。額外外委出洋巡哨。被賊戕害。以及遭風身故。照馬兵陣亡例。議給卹銀七十兩。○又題准。水師官兵。在洋被風漂失。該督撫一聞稟報。即委員確切詳查。一面分咨沿海各督撫。令

地方官一體挨查。如果查無下落。取具地方官印結送部。兵部將漂失官兵。照出洋巡哨遭風漂沒身故例。減半議卹。官員仍照漂沒身故例。降等給予廕贈。○又

諭。賽冲阿奏上年蔡逆滋擾鳳山時。所有臺灣陣亡義勇。查明奏請量加優卹一摺。鳳山縣武舉張元英。革職福甯鎮標右營千總陳藝。鳳山縣幕友監生周蓮。當蔡逆勾結臺匪滋事時。均能奮身敵愾。效命疆場。洵為義烈可嘉。張元英陳藝著加等照守備陣亡例賜卹。周蓮加等照知縣陣亡例賜卹。其打仗陣亡之

千總林士輝。署把總張朝龍。署外委王大中。外委巫鈇。兵丁林有良。林瑞枝。陳加駒。林榮光等。著照例咨部議卹。○又奏定。副將以下官員。在軍營立功。未分等第。後經身故者。照三等軍功之例議卹。○又奏定。隨征軍營官員。因公差遣遇賊戕害者。照陣亡例減半卹賞。並照革職效力人員陣亡例。降等給予世職。○十三年

諭。浙江提督李長庚。宣力海洋。忠勤勇敢。不辭勞瘁。懋著威聲。數年以來。因閩浙一帶洋盜滋事。經朕特命為總統大員。督率各鎮舟師。在洋剿捕。李長庚身先

士卒銳意擒渠。統兵在閩浙臺灣及粵省洋面往來跟剿。艱苦備嘗。破浪衝風。實已數歷寒暑。每次趕上賊船。無不痛加剿殺。前後殲斃賊匪無數。擒獲賊船多隻。蔡逆之魂喪膽。畏懼已極。聞李長庚兵船所至。四處奔逃。正在盼望大捷之際。乃昨據阿林保等奏到。李長庚於上年十二月二十四日。由南澳洋面駛入粵洋。追捕蔡逆。望見賊船。止贍三隻。窮蹙已甚。官兵專注蔡逆。窮其所向。追至黑水洋面。已將蔡逆本船擊壞。李長庚又用火攻船一隻。乘風駛近。挂住賊船後艄。正可上前擒獲。忽暴風陡作。兵船上下顛播。

李長庚奮勇攻捕。被賊船礮子中傷咽喉額角。竟於二十五日未時身故。覽奏為之心搖手戰。震悼之至。朕於李長庚素未識面。因其在洋出力。疊經降旨褒嘉。並許以奏報擒獲巨魁之時。優予世職。李長庚感激朕恩。倍矢忠藎。不意其功屆垂成之際。臨陣捐軀。朕披閱奏章。不禁為之墮淚。李長庚辦賊有年。所向克捷。必能擒獲巨憝。朕原欲俟捷奏到。將伊封授伯爵。此時李長庚雖已身故。而賊匪經伊連年痛勦之後。殘敗已極。勢不能再延殘喘。指日舟師緊捕。自當縛致渠魁。況李長庚以提督大員。總統各路舟師。今

歿於王事。必當優加懋獎。用示酬庸。李長庚著加恩追封伯爵。賞銀一千兩。經理喪事。並著於伊原籍同安縣地方。官為建立祠宇。春秋祭祀。其靈柩護送到日。著派巡撫張師誠親往同安代朕賜奠。並查明伊子現有幾人。其應襲封爵。俟伊子服闋之日。交該督撫照例送部引見承襲。其李長庚任內各處分著悉予開復。所有應得卹典。仍著該部察例具奏。○又

諭。據阿林保等奏提督李長庚等。在粵洋追剿蔡逆匪船。並閩浙兩洋舟師剿捕分幫土盜。各獲勝仗緣由等摺。除李長庚中礮身故。已另降恩旨優卹外。所有

隨同在事出力之提督張見陞。總兵許松年等。均著
交部議敘。護副將項統打仗受傷。即著以副將升用。
其傷亡兵丁。均照外委例賜卹。綫民等均著照例賞
卹。其餘受傷弁兵。除例賞外。如有因傷身故者。仍照
陣亡例賜卹。○又

諭據吳熊光等奏。總兵林國良率師船駛至了洲洋面。
追擊盜匪烏石二等。轟沈匪船數隻。賊匪紛紛落水。
正在得手之處。復有盜船陸續駛至。幫同拒捕。林國
良親身督戰。適遇颶風大作。坐船被賊火焚燒。林國
良與署都司林道材受傷陣亡等語。林國良等督師

勦捕洋匪。臨陣捐軀。實堪憫惻。總兵林國良著加恩。從優照提督例賜卹。並賞給雲騎尉世職。署都司林道材著加恩從優照都司例賜卹。其傷亡淹斃弁兵。並著查明照例卹賞。○道光二年奏定陣亡贈爵。統兵參贊都統授騎都尉兼一雲騎尉。前鋒統領護軍統領副都統授騎都尉。營總參領以下。前鋒校護軍校及有頂戴官員以上。授雲騎尉。令其子孫承襲。襲次完時。給予恩騎尉世職罔替。其先授世爵後陣亡者。按其等次。加以應贈之秩。合為一爵。令其子孫承襲。至一等公以上無

爵可加。令其嫡子襲一等公。以別子襲其餘爵。
○又定三品以下官員。出征立功後病故。無論
已未議敘。如係一等二等軍功。給予七品監生
一員。如係三等四等軍功。給予八品監生一員。
由該旗查明應襲子弟。如年已及歲者。即行揀
選。奏請帶領引。

見請。

旨承廕。如年未及歲者。止列名繕寫緣頭牌具奏。請
旨承廕。俟年已及歲。補行引。

見。隨旗行走。照品食俸。遇有各營之委前鋒校護軍。

校藍翎長揀選改用。如未仕而故者。准其補給一次。如係五等軍功。給予無品級之監生一名。於該員子弟內奏明充補。毋庸帶領引。

見。准其應試。不准隨旗行走食俸。未分等第者。照三等軍功例議卹。○六年奏定武職副將以下官員。在軍前立功後病故。該統兵大臣將該員立功大小分別等第造冊送部。無論曾未議敘。均查覈原保等第一體辦理。如係一二等軍功者。給予伊子七品監生。遇有把總缺出。該督撫揀選拔補。如係三四等軍功者。給予伊子八品監

生。遇有外委把總缺出。該督撫揀選拔補。如有未仕而故者。准其補給一次。如係五等軍功者。給予伊子無品級監生。立功未分等第者。照三等軍功例議卹。其監生內情願應試者。俱各准其應試。有情願隨營食糧者。准其隨營食糧。至無品級監生。亦准其以監生應試。及入伍食糧。如係旗員身任綠營立功後病故者。照綠營例議給卹賞銀兩。其應得廕監。照八旗官員軍營病故例辦理。其立功後病故兵丁。給予卹賞銀十六兩。○咸豐九年奏准。凡陣亡殉難文武職

官生監領催兵丁人等。如係生前功績卓著。或臨敵鏖戰殺賊多名。或被執不屈遇害慘烈。或一家同時陣亡殉難。或看守重大官物被戕者。准其奏請優卹。其有一人身兼二三項情節。及首先陷陣登城者。准其酌量指階奏請議卹。餘俱不准濫請從優指階。仍令該大臣將軍都統副都統將切實事蹟簡明聲敘。不得含糊鋪飾。致滋冒濫。○十年議准。官員由軍營保奏奉旨以何官升用。或免補何官以何官補用。或俟補何官以何官升用。暨由兵勇人等遞保升階尚未

升補旋即陣亡。奉

旨照升階議卹者。均無論有無實缺。及實缺品級大小。各照所保升階議卹。如奉

旨從優議卹者。於所保升階上加一等議卹。如軍營大臣奏請從優議卹指階議卹。奉

旨照例議卹者。仍照所得升階議卹。如奉

旨交部議奏者。按其生前功績死事情形。分別覈議其陣亡人員得有升銜者。亦與有升階人員一律辦理。實任人員。由部推升選補。業經題准。於奉

旨後陣亡者。無論已未給劄。均照推升選補官階議卹。陣亡人員。由軍營指請從優。照何官例議卹。或照何官例從優議卹。奉

旨允准者。其得有虛銜各員。准按虛銜加一等議卹。如原銜本係參將。請從優。照副將例議卹。如原銜本係參將。請照副將例從優議卹。亦僅照副將例議卹。不得越級加至總兵。其餘以此類推。

○同治二年奏定。軍營擬保員弁兵勇尚未具奏。旋即陣亡。交部照例議卹者。仍照原官出身議卹。如奏請從優議卹。或請照擬保官階議卹。

或請照擬保官階從優議卹。奉

旨著照所請。及奉

旨從優議卹者。官員照擬保升階升銜議給卹銀。照原官議給世職。兵勇照擬保官階職銜議給卹銀。毋庸議給世職。○七年奏定。凡請給卹之案。統兵大臣暨各督撫。一面具奏。一面將該故員弁等出身籍貫實缺營制。並所得升階升銜各項班次。及兵勇等所得翎頂軍功。係於何年月日何案內奉

旨賞給。詳細造冊。隨摺報部。以憑稽覈。僅有聲敘不

實者。即將卹典分別更正撤銷。將原報錯誤之
該大臣督撫交部議處。